

Fänschter zu und d`Läde dunde e Kamera montiere  
Sicherheit das eusi Vårs nid chasch us spioniere  
ich Komedi ha scho dänkt das wird euch nid glinge  
ich ha alli uf em Handy söll ich si für euch singe

Ich ha zum Bondesrot Schneider Ammann gseit Johann wiso umsverecke  
muesch du all dis schöne Fermegäld em Osländ go verstecke  
es get doch au be eus er Schwyz Banke wo so Stürdeals tätige  
ond wenn mer das ned glaube wotsch chaders d`Alice Schwarzer bestätige

Tämpo 80 of der Autobahn d`Vignette 100 Franke  
und jetze no 15 Rappe meh wend s`Auto wotsch go tanke  
jo de Doris Leuthard ehri Idee hani so dänkt em setze  
send öppe glich originell wie em Tschäppät sini Wetze

11 Plämpel hets a de Olympische Speel för eusi Schwyzer geh  
ond wend Hockeyfraue einzeln zelsch den wäres no vell meh  
jetzt womer so gueti Athlete händ wo so veli Medaille gwönne  
möge eus die stuure Böndner e 8 Jahr ned emol es Heimspeel gönne

Euse Regierigsrot de Alex Hürzeler duet sech e neuvi Holzvilla poschte  
aber ned öbbe be eus er Schwyz sondern z`Dütschland äne em Oschte  
d`Susanne Hochueli meint jo wenn de sis Hus os em Osländ cha importiere  
jo den chan ich be mer dehei jo au Osländer iquartiere

Ich ha z`Züri do sone Dame gfrogt es wörd mi no interessiere  
wiso be dene neue Sexboxe do de Verkehr ned duet floriere  
drofabe het mer die Dame gseit das ganze esch doch e Schweinerey  
wie wotsch do öberläbe met dene paar Schneutz vo de Sittepolizey

Es riese Komplimänt vo mer liebi Brugger för euches Fescht „Best of Brugg“  
tollu Beizli und tollu Musige do dänk ich gärn und lang no zrugg  
nor met em Bier em Müllerbräu also do händers ned ganz breicht  
5 Chöbeli hani gsoffe am Fescht und 7 hani gseicht.

Eusi Riniker Stemmbürger jo die gänd mer z`dänke  
düend a de letschte Gmeindsversammlig d`Stüürerhöchig versänke  
en anbetragt vo dem Verdikt esch die Sach wohl gässe  
und ich chan au en Zuekonft bem Brunneplatz de Wiehnachtsbaum vergässe

Nüt gäg de alti Gmeinschreiber Jörg Hunn doch esch s`Niveau ich fends gedegge  
met sim Nachfolger Martin Maumary of eusere Gmeindskanzley gwalting gstege  
das gsesch doch elei scho bem Metteiligsblatt s`haut di glatt os de Fuege  
det chasch jetzt nähmli näb em Tegscht au no Beldli aluege

D`Fabienne Schori genannt „Faby“ du das esch e Frau met Pfeff  
jo die het als Tamby eusi Gugge d`Opus-C-Voll im Greff  
nei die macht doch wörkli en super Job do düend er mer doch zuestemme  
drumm hani mech gfrogt wiso mer Schwyzer über d`Fabi no müend go abstemme

Chörzlech säg ich zum Reinhard May los ich wott jo ned übertriebe  
aber jetzt muesch eis vo dine Lieder doch tatsächlich neu schriebe  
well sed em 1. Januar das weiss sogar mini Mamme  
esch de Gärtner nimm de Mörder sondern euse Amme

Züri ond Aarau die hätte gärn e neus Fuessballstadion  
und d`Herscheplatz-Muuser die hätte gärn es abhörsechers Telefon  
d`Lara Gut die hätti gärn es Ragusa als anderi esch`ere worscht  
onds Komedi-Team hätti zum Schluss gärn öppis gäg de dorscht

*Der Komedi*<sup>14</sup>

Wänd er me bsueche? Ich be dehei onder „[www.komedi.ch](http://www.komedi.ch)“

Zugabevers

Wäg erer Kanone en Penisform wo Konfetti duet useloh  
händ d`34er Höckler am Wendischer Umzug die roti Charte becho  
die hätte schiends scho dörfe teilneh doch esch leider s`Dummi  
d`Wendischer heige druf behart be eus nor mett Gummi

Zugabe zu Vers 2

ond wenn euch do die Pointe ned passt müender ned de Hond of mech hetze  
denn chönnd er eifach d`Alice Schwarzer dor de Ueli Höhnes ersetze

Zugabe zu Vers 11

ond sed de Vehdokter au no metmesche tuet du ich fend das krass  
heists e eusem Gmeirot alles Ueli oder was

Zugabe zum Zugabevers

Z`Brugg send`si ned so heickel gsi det het de Wage dörfe teilneh  
ond was esch passiert s`het en neue Zueschauerrekord geh